

Ebe ni a keke ghi egbo Iburu Eni e miesuo

*Ungmemhi oyi Eshinegba ni o rote obo oyi Omiqli
bhale*

¹ Agbo-ndede, ebubu egheghe ali ode ododa Eshinegba o te ri emekeguele nu ititawa ngme. ² Ama omiqli ni o ze ni o le ugu emhikpa o ke ro nu awa ngme ogbele ikpukhokho ni awa la memena. Obo oyoli o gbo rote ma agbo ³ Loli o ri ufumhi oyi Eshinegba khase. Eri o gbo li abi Eshinegba o li tee. Loli o ri ungmehi ni o tsua ekpabo oyoli mu agbo nya mholi. Abi o ro khuese awa olamhe-a se, o shito ukiokie obita na Eghiele oyi Eshinegba ni o mholi ekpabo ni o fune nya.

Ufumhi oyi Omi Eshinegba

⁴ A ri oni omiqli fu dose igeni abi eva ni Eshinegba o ro na li o li fu dose oyewe.

⁵ A geni onoghwo Eshinegba o tigbe lie oli,

“Omimhe u khi
amo mhi te khi Itẹ?”

Ali onoghwo o gbolo oli;

“Mhi ya khi Ita e,
yeye u khi Omimhe?”*

⁶ Ama abi Eshinegba o ro ya ghie Omiqli oghwo kpe je elemhi agbo, oo,

“Igeni eyi Eshinegba nya

* **1:5** Li ze Iwolo 2.7; 2 iSam 7.14; 1 Okhe 17.13

e mema nyese ukhomhi ga li.”†
 7 Abi o ro o ngme ingme oyi igeni, oo,
 “O ma igeni eyoli
 abi akpekpeli,
 o ma eni ege ga eyoli
 abi elemhi ere.”‡
 8 Ama abi Eshinegba o ro o ngme ingme oyi Omioli,
 oo,
 “Eshinegba u khi!
 Omheso oye,
 agboagbo o ya la o.
 Ipfuse ali igesikia
 u ro ya ke mhese
 na egbo eye.
 9 Ipfuse u nono,
 ingmobe o a ghole e,
 irarigho Eshinegba u khi!
 Eshinegba oye, o she re
 fu dose etu-e,
 itobo khi o ri
 oili oghelo to e ukhomhi.”§
 10 O gbolo lie,
 “Yeye Onomhue,
 rote igbaekele,
 u te ma agbo.
 Abo eye u ro ma ukhuli.
 11 Wewe nya e ya pfua,
 ama yeye u kiele e la o.
 E ya taa abi itsua ni a so.
 12 U khili we abi ide,
 e ya oghie abi a lie

† 1:6 Li ze iDeut 32.43 ‡ 1:7 Li ze Iwolo 104.4 § 1:9 Li ze Iwolo 45.6,7

oghie itsua ni a so.
Ama abi u li u kiele e li,
agbo oye o a tigbe
ya mholi ukpese.”*

¹³ Ageni onoghwo Eshinegba o tigbe lie oli,
“Shito mhe ukiekie obita omhese,
ramhi ni mhi ro ya ri ebe e
mele ukpekhome akphawe-nga oye-a?”†

¹⁴ Oa khi iyemhe eni ee ga Eshinegba igeni nya e
khi, ni Eshinegba oo ghie e ke ga eni e ya le ugu
imiepfuese?

2

Ukpokpomhi imiepfuese

¹ Irarigho a ze ni awa lolo mu igesikia ni awa suo
mhue, ini a khi tsua awa ibe vu. ² Irari khi ini
usomhi ni igeni e bhale ya guele, o khi egbegbo,
ni a ya na egbo ni ea roli gbe akanya osoli to shi;
³ see awa li ya pfue oni osoli ona, ini awa ri eloe
gbe ukpokpomhi imiepfuese oghoghoho ni Onomhue
lolighuo o te odode gue le, ni eni e suo li, e gueye
anye khi igesikia lo? ⁴ Oni usomhi ona ni Eshinegba
o gbo ri olele, ali ikanya oshabo ali onyaloa ododa ze
otsese shi, li shi isomhopfa eyi Ayemhe-no-pfuase ni
o kemhi abi o li ghole oli shi.

Ijesu o bhale agbo abi ogbo

⁵ Eshinegba o a ri omhese oyi agbo ni oo bhale nga
igeni obo, ikhi agbo ni awa ngme ena. ⁶ Ama, a
mholi ashini a ngme oli shi elemhi Ebe-no-pfuase,
ni oo.

* **1:12** Li ze Iwolo 102.25-27 † **1:13** Li ze Iwolo 110.1

“Elo ọgbọ fẹ khi,
 ni ingme oyọli o rọ na mu
 yeye Eshinẹgba egbe,
 elo ọ khi ni u rọ
 lina ri ẹlo ẹ khu ọli?

⁷ U ma li kpọke
 na igeni dẹnẹ,
 u ri ufumhi
 ali ekpe rughu ọli,
 u rọli loghie nga
 emini u ma nya.

⁸ U rọli loghie
 emhi nya.”*

Eshinẹgba ọ she ri emini ọ ma nya na li ọ rọ ke mhesẹ shi. Ọa kẹsẹ emhikhoghuo le ni ọa rọ shi ọli omhesẹ. Ama memena, awa aa kie mẹ eni emhi nya pfo ne ni ọ rọ nali ọ ke mhesẹ shi. ⁹ Ama ijesu awa a mẹ, ni a kpe ma kpọke na igeni ukuku ọ dẹnẹ. Oni a ri ufumhi ali ekpe rughu memena itobọ eghuli ni ọ ghu. Ighọ lọ, okhale oyi Eshinẹgba o rọli ghu-a na ẹgbọkpa.

¹⁰ Ni Eshinẹgba, ni ọ ma emhi nya ni ọ mu wẹ mhọli, ọ mẹ asha ri oni ufumhi ona na ebubu ẹgbọ, ọ rọ ri ijesu khi oni ọ gba pfo rọte osoli ni ọ mẹ. Irari khi ijesu ọ rẹ ẹgbọ nya bhale imiepfuese.

¹¹ Ghe oni ọ ri ẹgbọ pfuasẹ ali eni a rọ pfuasẹ nya, unuẹkpe oghuo e ke ga khi. Lọli o zẹ khi omama ọa mu ijesu ni ọ rọ lu wẹ inyoghuo. ¹² Ọọ Eshinẹgba,
 “Mhi ya gueye
 inyoghuo-mhẹ
 emini u she riẹlẹ,
 Mhi ya la ilegba oyẹwẹ

* **2:8** Li zẹ Iwolo 8.4-6

to uwolo ikueghie oye.”†
 13 O gbolo e,
 “Mhi ya regbenga
 Eshinegba.”
 O gbolo e,
 “Ghe mhemhe ali eniye
 ni Eshinegba o ro na mhe.”‡

14 Aborokhia khi imi Eshinegba, egbo ni e ze idiegbe ogbo ali oia e khi, loli iJesu Omioli o ro li mele ogbo ni o mholi idiegbe ali oia-a. Eri o lina ini o me asha rote eghuli ni o ghu pfuse Okphaghie-a ni o kpe mu ekpabo oyi eghuli mhue, 15 ni o me asha pfuese egbo ni ulishi eghuli oo mu elekhele. 16 Egbegbo lo khi oga khi igeni o bhale ya kpaghie obo, ama imimi Aburaamu. § 17 Itobo ona a ro roli li abi inyoghuo oli nya odekhode. Ni o me asha khi Okpodalo-ugamhi oyi Eshinegba ni o kpeda nya, ni o mholi igesikia ali ilelemhi shi elemhi ugamhi oyi Eshinegba, ni o me asha shishi olamhe eyi egbo-a. 18 Irari khi o li me osoli abi a ro mu oli fe, o li dobe e kpaghie eni a lili e mufe obo.

3

Ijesu o fu dose iMosisi

1 Irarigho, inyoghuo-mhe ni Eshinegba o ze ni e khi egbo ni e pfuase eyoli, a sa ingme oyi iJesu ni awa lui aghiusomhi na kee, ali Oga oyi ekpodalo ugamhi nya. 2 Eri o ri igesikia deba Eshinegba, ni o ze oli o ke gbe akanya eyoli, ezeze abi iMosisi oni oo ga o li ri igesikia gbe akanya elemhi Owa oyi

† 2:12 Li ze Iwolo 22.22 ‡ 2:13 Li ze Aza 8.17,18 § 2:16 Li ze Aza 41.8-9

Èshinẹgba.* ³ A she mẹ khi iJesu ọ mhue imueloe ni o fu dose oyi iMosisi, ezeze abi atsona ọ lie mholi imueloe ni o fu dose owa ni ọ to. ⁴ A kie kpe lese khi ogo ọọ to owa kpa, Èshinẹgba ọ ma emhikpa. ⁵ iMosisi ọ khi ogo igesikia elemhi Owa oyi Èshinẹgba abi oni ọọ ga. Akanya ni ọ gbe o khi otsele oyi igesikia oyi emini a ya ngme ogbe na ako. ⁶ Ama iKirisiti ọ khi Omi Èshinẹgba ni ọ mhesẹ e shi Owa ugamhi oyoli. Owa oyoli awa khi ini awa da kie mu igbedu ali irudushi oyawa ni awa regbenga mhue ne.

Iyemhe a ni a ro na Egbọ eyi Èshinẹgba

⁷ Irarigho, abi Ayemhe-no-pfuase ọ ngme, ni ọọ,
 “A kha suo uruli
 oyi Èshinẹgba amo,
⁸ a khi zese udu-a,
 abi eni e bia e e li
 egheghe ni e ro ọ riele
 umha-sueso deba Èshinẹgba.
 Egeghe ni a ro la
 odagbe ifufu mu we fe,
⁹ ikhi obini ita e e la
 mu mhe fe, mhesẹ mhe bino,
 e me emini mhi riele
 elemhi ikpe egbhueva
¹⁰ Loli o ze ni elemhi e ro bi mhe
 deba oni agbhotu ogho,
 ni mhi ro lie, ‘Egeghe kpa
 udu oyewe o ro rewe lo ebuli,
 ea lese ode eyemhe.’
¹¹ Irarigho, mhi ro ri

* **3:2** Li ze iNọba 12.7

elemhi-ibibi shi-ẹmuẹ liẹ,
 ‘Ẹa ya tigbe lo
 iyẹmheẹa oyẹmhe.’ ”†

¹² Inyoghuo, a mu egbe ẹ ini ọngẹ ẹ ọ khi mholi udu umha-miesuọ, ni ọ ya lase ode oyi Ẹshinegba ni ọ la ọ le. ¹³ Ochoghọ a ke ye egbe ẹ ude, itobo khi, “Amo.” Oni ẹghẹghẹ o kie la ọ, ni a rọ ọ mu pfi, ini udimhi ni olamhe ọọ di ọgbọ o khi ri ọngẹ ẹ zese udu-a. ¹⁴ Eni e kuma iKirisiti ọ awa khi ini awa lolo mu igbedu ni awa rọte eke mholi mhue ya ramhi ukpeş. ¹⁵ Abi Ebe-no-pfuase o ngme.

“Ini u suọ uruli
 oyi Ẹshinegba amo,
 a khi zese udu-a,
 abi eni e bia ẹ e li
 ẹghẹghẹ ni e rọ ọ riẹle
 umha-suesọ deba Ẹshinegba.”‡

¹⁶ Eghuo e khi eni ẹgbọ ni e suọ uruli oyi Ẹshinegba ni e riẹle umha suọ esọ deba li? Ọa khi eni iMosisi ọ rọte eke ijipiti rue lasele? ¹⁷ Eghuo ọ biselemhi deba ikpe egbhueva? Ọa khi eni e lamhe, ni e ghuloa shi ọdagbe ifufu? ¹⁸ Eghuo Ẹshinegba ọ shi ẹmuẹ deba khi ẹa ya tigbe lo iyẹmheẹa, ọa khi eni ẹa suọ esọ na li?§ ¹⁹ Irarighọ, awa me khi itobo umha-miesuọ oyewe ẹa rọ dobe lo.

4

Iyẹmheẹa ni a shobo na ẹgbọ eyi Ẹshinegba

¹ Aborokhia khi ishobo ni awa rọ ya lo iyẹmheẹa khi o kie la ọ, awa mu egbe awa ini o khi de onge

† **3:11** Li ze Iwolo 95.7-11 ‡ **3:15** Li ze Iwolo 95.7-8 § **3:18** Li ze iNoba 14.1-35

ę obọ-a. ² Awa she li suọ oni usomhi onete abi wẹwẹ e ke li suọ ọli. Ama oni usomhi ọa mu wẹ ẹloe irari khi ẹa ri irudunga mie ọli. ³ Awa ni awa mhue irudunga, awa ya lo oni iyemhea. Ama eni ẹa miesuo, Eshinegba ọọ lię

“Elemhi ibibi
mhi rọ shi-emue,
khi ‘Ea ya tigbe lo
asha iyemhea oyemhe.’ ”

Aboriekhia rọte abi ọ te ma agbọ ọ te rieęe oni iyemhea ona shi eke.* ⁴ A ngme na shi Ebe-nopfuase abi ọ rọ ngme ingme ogbeęe onuzi-ishilua khi, “Eshinegba ọ yemhe ikanya-a nya-a ẹlenizu-ishilua.”† ⁵ A gbo ngme oni ingme onana khi. “Ea tigbe ya lo iyemhea oyemhe.”‡

⁶ Elese e laọ ni a ya ri eghẹghẹ na ni e rọ lo oni iyemhea. Irari khi eni e kpe suọ oni Usomhi Onete ẹa lo oni iyemhea oghọ, itobọ khi ẹa miesuo. ⁷ Irarighọ, Eshinegba ọ rọ gbo ri ẹlelese shi eke ni a rọ ya lo iyemhea oyọli, ni ọ lu Amo. Ezeze abi ọ rọte unu oyi iDefidi ngme ọli ẹlelese abi a kpe li ngme ọli, ni ọọ:

“A kha suọ uruli oyọli Amo,
a khi zese udu-a.”§

⁸ Ini iJoshua ọọ ri iyemhea na wẹ lo, Eshinegba ọa kha gbo te ikpukhokho ri ogbeęe olese shi eke na wẹ.* ⁹ Abi o li ena, Ogbeęe iyemhea o kie la ọ, ni egbọ eyi Eshinegba e la yemhe-a ¹⁰ Itobọ khi oni ọ da lo iyemhea oyi Eshinegba ne, eri ọ li yemhe ikanya eyọli-a, abi Eshinegba ọ li yemhe

* 4:3 Li zę Iwolo 95.11 † 4:4 Li zę Igbae 2.2 ‡ 4:5 Li zę Iwolo 95.11 § 4:7 Li zę Iwolo 95.7-8 * 4:8 Li zę iDeut 31.7; iJosh 22.4

eyoli-a.† ¹¹ Irarigho, awa roshaka ini awa dobe lo oni iyemhea ogho, ini awa khi de itobo khi awa khonya we riele umha-sueso.

¹² Irari khi eri ungmehi oyi Eshinegba o mholi agbo, odo gbe akanya. O mu dose itakobi ozalo eva kpa, ni odo gbeso lo ogbo udu, o khueghie oli-a, ni odo guano emini e la usamhi ali ayemhe, o gbo li gbeso lo ikpese ali ikhoro na elemhi igua. O dobe e khueghie ingeli ali isamhi na ekelemhi udu-a.

¹³ Emhikhoghwo o la emini a ma nya ni o sheli shi oli o. Eri emhikpa e na khueghie-a shi ukpelo oyi Eshinegba, ikhi oni awa ya ri abo khase abi awa li gbe.

Ijesu o khi Oga Okpodalo-ugamhi Oniemhi oyawa

¹⁴ Irarigho, a ze ni awa lolo mu irudunga ni awa mholi mhu, abi o ro da khia khi awa mholi Oga oyi ekpodalo ugamhi ni o Funo ni o she je odalo oyi Eshinegba. Loli o khi iJesu Omi Eshinegba. ¹⁵ Oa khi Oga oyi ekpodalo ugamhi ni o ya lelemhi awa shi emini awa do-a riele. Ama oni a she mu fe abi awa, odekhode o khi, ama o tigbe lamhe. ¹⁶ A ze ni awa ri igbedu ti deba Eshinegba ni o mholi isomhelemhi. Agho awa te ya mie ilelemhi ali isomhelemhi ni o ya kpaghie awa obo eghenge ni awa ro o nono ikpaghiobo.

5

¹ Oga oyi ekpodalo ugamhi, ni a da rote elemhi egbo ze kpa, eri a ze oli ni o ke migha na we ingme ugamhi eyi Eshinegba. Ni o ke riele irona ali iluasobo na we shi olamhe eyewe. ² Ofie o roo deba

† **4:10** Li ze Igbae 2.2

eni ẹa leṣe emini aa li, ni ẹẹ da ode, itobọ khi lọli ọ li mhọli ode ni ọa te li gba pfo. ³ Onana o zẹ khi egbọli ọ kpe luasobo a na shi olamhe eyọli, neni ọ luase na egbo nya shi olamhe oyewe. * ⁴ Ogbokhoghuo, ọa ya rue oni okhale ona ni a ro lu ogbo shi Oga oyi ekpodalo ugamhi. Eshinegba lolighuo tse ọọ lu ogbo, ọ roli khi Oga oyi ekpodalo ugamhi, ezeze abi a li lu Eroni.†

⁵ Igho iKirisiti ọa li mie oni okhale ro lu egbọli Oga oyi ekpodalo ugamhi. Ama Eshinegba ọọ li,
“Omimhe u khi,

Amo mhi te khi Ite.”‡

⁶ O gbo ngme ọli shi ashese,
“Okpodalo-ugamhi oyi Eshinegba
u khi agboagbo,
ezeze onabi iMekizedeki.”§

⁷ Abi iJesu ọ ro la agbo, atseṣe ali iku-ame-eviẹ alo iJesu ọ roṣo sọ iromhi lema Eshinegba, oni ọ kha tsumhi ọli obọ eghuli. Itobọ khi eri ọ ri egbọli tiemhile, ri egbọli na Eshinegba pfo, lọli ọ ro suṣo iromhi eyọli.* ⁸ Abi o riẹ khia khi Omi Eshinegba ọ khi, osoli ni ọ me, o roli wena issueso na Eshinegba. ⁹ Abi a ro roli gba pfo se, obọ oyọli eni e suṣo esọ nali e ke rote mhọli imiepfuese na agboagbo. ¹⁰ Eshinegba ọ zẹ ọli Oga oyi ekpodalo ugamhi, onabi iMekizedeki.

Ogbọ khi pfi irudunga ona shi eke

* 5:3 Li zẹ iLev 9.7 † 5:4 Li zẹ Okiali 28.1 ‡ 5:5 Li zẹ Iwolo 2.7 § 5:6 Li zẹ Iwolo 110.4 * 5:7 Li zẹ iMat 26.36-46; iMak 14.32-42; iLuk 22.39-46

11 Emhi ebubu e la ọ ni awa ya ngme shi eni ingme enana, ama o ma a munu ni a rọ zọlọ wẹ-a lo ẹ esọ, itobọ khi aa mhọli oghuẹmhe ni a rọ suọ. 12 Abi o riẹ khia khi a she ramhi eni ẹẹ esẹẹ ẹgbọese, ni a rọ kie khi eni a sẹsẹ owẹna eni odode eyi ingme Ẹshinẹgba eghọ, ẹnyeli o ti ẹ egbe a tẹ eminale ni o toto ne. 13 Ọnini ọ da kiele ẹ nye ẹnyeli ne, eri ọ li abi ọmọ ni ọa lolo mhọli ilẹsẹ shi osẹsẹ iguẹ-ngeli.† 14 Ama eminale ni e toto, eni e womhẹ ẹloẹ ẹẹ le. Ikhi eni e ri itobọ eni eminale ni e toto ni ẹẹ le ẹghẹghẹ kpa lẹsẹ ikhiọda shi emini o migha shi onete ali onobe.

6

1 Irarighọ, a zẹ ni awa je odalo shi osẹsẹ ni e womhẹloẹ ni awa pfi osẹsẹ ni a rọ gba ingme eyi iKirisiti ekẹ le. Awa khi ke gbo tiemhi ekẹ je osẹsẹ ena imupfi rọte ikanya ebe lasele, ali osẹsẹ ena irudunga Ẹshinẹgba, 2 ali osẹsẹ ibatizi, ali irobọ-nga ọgbọ egbe, ali iroṣte eghuli guale oyi eni e ghua, ali osẹsẹ oyi iguẹzọ ni ọgbọ la je obini ọ ya la agbọagbọ. 3 O kha ghọle Ẹshinẹgba awa ya je odalo elemhi owẹna.

4-6 Ẹgbọ ni e she kpe mẹ ákpá, ni e she kpe mie isomhopfa oyi iloghie ghue, ni e kpe mie Ayẹmhe-nọ-pfuasẹ, ni e she lẹsẹ onete ni o la ungmehi oyi Ẹshinẹgba ali ekpabọ oyi agbọ ni ọọ bhale, ni e tigbe tsua irudunga oyẹwẹ pfia, ọa ke zẹ ẹ riẹlẹ ni a doṣe nyenẹ wẹ gbolo bhale imiesuọ, aborọkhia khi eri e she gbolo ta Omi Ẹshinẹgba ma apfida utonuzi-eva, ri omama mu ọli gboo.

† 5:13 Li zẹ 1 iKọri 3.2

⁷ Eri awa ẹgbọ awa li abi eke. Ini amẹ o ruẹ shi eke ni emhi ẹkomhi e rọ zẹ na ọghiale, ikhivọsẹ oyi Ẹshinẹgba o khi. ⁸ Ama ini o zẹ igba ali ebuli-a, ọgbọ ọa mhọli emini a rọli ya riẹlẹ, o ya la okhẹna ipfiunu-a oyi Ẹshinẹgba ali khi a ya ri erali toşẹ ọli-a.*

⁹ Emọle mhe, ini anye riẹ lina a ngme i, anye leşẹ khi ọa khi ẹ ẹ o nu ngme, anye leşẹ gboo khi emini e ti egbegbọ a riẹlẹ, enabi ẹgbọ ẹẹ riẹlẹ ini a mie wẹ ẹ pfuese. ¹⁰ Ẹshinẹgba ọa ya gbe ọgbọ azẹba. Ọa ya yele ikanya ni u gbe-a ali inono ni u rọkhasẹ khi u nono ọli abi u li ri ikpaghiobọ na ẹgbọ eyọli ni u kiele ẹ kpaghie wẹ. ¹¹ Anye ẹ nono ni ọgbọgbọ ọ mu ọmuegbe ni ọ mhọli mhue ya ramhi ukpeşẹ, ni ọ rọkhasẹ abi irudushi oyọli o toto ramhi. ¹² Anye ẹa nono ni a mele ewaza-a, ama ni a ke khonya eni e rọte irudunga ali irobomudu mie ishobọ oyi Ẹshinẹgba.

Ekha oyi Ẹshinẹgba ọa ya fiakua

¹³ Abi Ẹshinẹgba ọ rọ tse ekha na Aburaamu, Ẹshinẹgba ọ romhi egbọli aborokhia khi ọgbọşẹ ọa ke gbo fu doşẹ ọli ni ọ ke ya romhi. ¹⁴ Ọọ li, “Mhi mema ya khi vọşẹ ne, mhi ya rẹ mhọli eniye ali imi-imi ni e bu.”† ¹⁵ Aburaamu ọ ri abọ mu udu, irarighọ ọ mẹ emini Ẹshinẹgba ọ rọ tsekha nali mie. ¹⁶ Ini ọgbọ ọ tse ekha, ọgbọşẹ ni o fu doşẹ ọli ọọ romhi ni o mu oni ekha migha, ẹghẹghẹ akhọkhomhe ọa ke la ọ, oni ekha o migha. ¹⁷ Eri Ẹshinẹgba ọ romhi isheli rọ rọli khasẹ eni ọ tşẹ ekha na gboo, khi emini lọli rọ tse ekha khi lọli ya riẹlẹ

* **6:8** Li zẹ Igbae 3.17-18 † **6:14** Li zẹ Igbae 22.16-17

ọli, khi ọa ya fiakua. ¹⁸ Irarigho, Eshinegba o ro ri emhi eva ena shi eke; ekha ali isheli ni o romhi. Eni emhi eva ena ẹa ze mupfi irari khi Eshinegba ọa tigbe ya lo ẹgbhọli ghue. Irarigho awa ni awa she na deba li shi akhukhu, awa ya mhọli iregbeda abi awa li mu irudushi oyọli ni o la odalo mhuẹ. ¹⁹ Eri oni irudushi ona o li abi azu ni o toto ni o migha gbaa, ni ayemhe oyawa o mhuẹ. Onana o ri awa dobe dose ode ugbakpi ni a ro pfa ode ni o lo ashini o pfuase ne nya-a.† ²⁰ Ijesu o she ralo itobọ oyawa, o mele Oga oyi ekpodalo ugamhi na agboagbo-a, onabi iMekizedeki. §

7

iMekizedeki okpodalo-ugamhi oyi Eshinegba

¹ Oni iMekizedeki ona, oghie oyi eoli iSalemu o khi, o gbo khi okpodalo-ugamhi onayi Eshinegba ni o Yagha ne nya. Abi Aburaamu o ro rote okhọli ni o la gbe ighie okhọli jele, iMekizedeki o ya ee ọli ode, o so iromhi khivose na Aburaamu. ² Igho Aburaamu o rote itsua ni o rote okhọli ti nya ze aze-oghuo-igbe na li. Emini a ri iMekizedeki ngme khi, “Oghie Igue-ngeli,” emini a ri oghie iSalemu ngme khi, “Oghie opfomhe.”* ³ Oa mhuẹ ita wekhi inyo, wekhi eri o mhọli unuekpẹ ni o te lasele, wekhi eri a mhuẹ ashini a keke abi a li bia li ali abi o li ghu-a shi. Abi Omi Eshinegba, Okpodalo-ugamhi oyi Eshinegba na agboagbo o khi.

† **6:19** Li ze iLev 16.2 § **6:20** Li ze Iwolo 110.4 * **7:2** Li ze Igbae 14.17-20

⁴ Wàá mę ashini ọ fu ramhi. Egbegbi Aburaamu ọni ọ gba ushishi ẹgbọ iZireni eke le, ọ zę aze-oghuo-igbe ẹpfue ni ọ tsua rọte okhọli ni ọ ye na li. ⁵ Eri ushi ọọ Imi iLiva ni e khi ekpodalo-ugamhi eyi Ẹshinegba e ke mieno ẹgbọ iZireni ni e khi inyoghuo wẹ, aze-oghuo-igbe, aboriekhia khi imi-imi Aburaamu e ga khi.† ⁶ IMẹkizedeki ọa khi omi iLiva, ama ọ mie Aburaamu aze-oghuo-igbe, sọ iromhi khivose na li, ikhi omose ni ọ mie ekha ni Ẹshinegba ọ shi na li. ⁷ Akhokhomhe ọa la ọ khi ọgbọ ọni kpeda, ọọ sọ iromhi ikhivose na ọni ọ kpọke. ⁸ Eralo-ugamhi eyi Ẹshinegba ni ee mie aze-oghuo-igbe, ẹgbọ ni ẹẹ ghu-a e khi. Ama iMẹkizedeki ona ọ fu dose wẹ nya itobọ khi a gueye awa khi agboagbo ọ laọ le. ⁹ Ọgbọ dobe ẹ lie khi imi imi iLiva ni ẹẹ mie aze-oghuo-igbe, e she li zę oni aze-oghuo-igbe ona rọte obọ oyi iti-iti itawẹ Aburaamu. ¹⁰ Itobọ khi ẹghẹghẹ ni iMẹkizedeki ọ rọ mę Aburaamu, iLiva ọ kie la elemhi oyi Aburaamu. Ọgbọ a bia li ne.

Abi iJesu ali iMẹkizedeki e li kọ egbe

¹¹ Irari khi ini akanya eghiele ekpodalo-ugamhi eyi Ẹshinegba, ni Ushi oyi iMosisi o rọ migha, ni imi imi iLiva ee gbe, o dobe ri ọgbokhoghuo gba pfo lo, aa kha ke gbo ri ọkpodalo-ugamhi oyi Ẹshinegba ọlese lasese, ọni ọ li abi iMẹkizedeki, ni ọa khi unuekpẹ oyi iLiva wẹkhi oyi Erọni. ¹² Irari khi ini a mu eghiele ona ekpodalo-ugamhi eyi Ẹshinegba pfi, a mema li ya mu ushi pfi. ¹³ Onomhue oyawa ni a ngme ingme oyọli ena, ẹdẹli olese ọ te lasese. Ọgbokhoghuo ọa rọte oni ẹdẹli oyọli gbe akanya ọkpodalo-ugamhi oyi Ẹshinegba ukhomhi atẹte ghue. ¹⁴ Awa ga lese gboo

† 7:5 Li zę iNọba 18.21

khi Onomhue, edeli iJuda o te lasele. IMosisi o a teva oni edeli abi o ro o ngme ungmehi oyi ekpodalo-ugamhi eyi Eshinegba.

¹⁵ Ibhale ni okpodalo-ugamhi oyi Eshinegba olese ni o li abi iMekizedeki o bhale, o rokhase gboo khi ushi oyi Eshinegba o she mu pfi. ¹⁶ Oa khi itobo khi o rote edeli oyi iLiva lasele abi ushi oo a ke li, lolu a ro ze oli okpodalo-ugamhi oyi Eshinegba, ama itobo khi lolu o mholi ekpabo ni o ro o la agbo agboagbo. ¹⁷ Itobo khi Ebe-no-pfuase o ngme oli khi,

“Okpodalo-ugamhi
oyi Eshinegba
ele na agboagbo u khi,
onabi iMekizedeki.”[†]

¹⁸ Eri a ri obo gbe ushi oni elele nye, itobo khi o a mholi ekpabo wekhi eri o gbe akanya. ¹⁹ Irari khi Ushi oyi iMosisi o a dobe ri emhikhoghwo gba pfo. Memena irudushi oni o ti ne a ke ro na awa, ni o ri awa dobe ti bhale mama Eshinegba.

²⁰ Eshinegba o gbo romhi ishe ma o khi iKirisiti khi okpodalo-ugamhi oyi Eshinegba o ya khi agboagbo. Oa romhi isheli abi a ro ri egboese ya le oghie ekpodalo-ugamhi eyi Eshinegba. ²¹ Ijesu tse a romhi isheli ro le eghie abi Eshinegba o re.

“Mhemhe Onomhue
mhi she shi-emue, khi
‘Okpodalo-ugamhi oyi Eshinegba
u ya khi agboagbo.
Mhi aa ya da o ghue.’ ”[§]

[†] 7:17 Li ze Iwolo 110.4 [§] 7:21 Li ze Iwolo 110.4

²² Itobọ oni ẹmụę ni Ẹshinẹgba ọ shi, iJesu ọ rọ khili oni iregbenga ni ọ ri awa mhọli ishobọ onogbọ ni o tine.

²³ Ikhiọda olese ni o gbo la akaghọ khi, ekpodalo-ugamhi eyi Ẹshinẹgba ebubu elese e la ọ ẹghẹghẹ ishobọ onodiọ. Ẹghẹghẹ aghọ ini ọkpodalo-ugamhi ọyi Ẹshinẹgba ọ ghua, ọlese ọ to ẹlolo ọli. ²⁴ Ama eri iJesu ọ la ọ agbọ lẹ agbọagbọ, akanya ọkpodalo-ugamhi ọyi Ẹshinẹgba oyọli, eri o migha agbọagbọ ni ọa zẹ ẹ kpe na ọgboęse. ²⁵ Irarighọ, ọ dobe ya tsumhi eni e ri eva oyọli bhale deba Ẹshinẹgba zeghele. Itobọ khi eri ọ la ọ agbọagbọ, ọọ lema na wẹ.

²⁶ IJesu ọ khi ọni Ọkpodalo-ugamhi ọyi Ẹshinẹgba ni ọ kpeda, ni ọ ri emini awa nono na awa. Ọni ọ pfuase ọ khi, ọa mhọli umhaguekia wẹkhi olamhẹ shi egbe. A she zọlọ li iteva ena olamhẹ lasele, a yase ọli nga yagha doęe idane. ²⁷ Ọa li abi Ega eyi ekpodalo-ugamhi eyi Ẹshinẹgba elese ni e kpe luase obọ oyi igbe-olamhẹ kua na egbewe ẹlẹkhele, neni e tigbe ẹ luase na ẹgboęse. Iluasobo oghuo iKirisiti ọ lẹse luase utoghuo kpele shi olamhẹ oyi ẹgboęse abi ọ rọ ri egbọli luasobo.* ²⁸ Ẹgbọ eni mhue ashini o kie kpọ wẹ le shi, Ushi oyi iMosisi oo zẹ shi Ọga ọyi ekpodalo ugamhi, ama ishobọ ni Ẹshinẹgba ọ ri isheli shi, ni o kpe ukhokho bhale khẹ Ushi oyi iMosisi, ọ rọ zẹ Omi Ẹshinẹgba, ni a she rọ khi ọni ọ gba pfo agbọagbọ.

8

Ọga ọyi ekpodalo ugamhi ọna Ishobọ onogbọ

* **7:27** Li zẹ iLev 9.7

¹ Ọzukhomhi emini anye ẹ ngme na. Awa mhọli Ọga ọyi ekpodalo ugamhi, ni ọ shitọ ukiẹkiẹ obita omhẹse ọyi Ẹshinegba ni ọ mhọli ekpabọ nya na obini iloghie agbọagbọ,* ² ni ọọ ga abi Ọga ọyi ekpodalo-ugamhi eyi Ẹshinegba elemhi Okhologo ni a ri ode ghi ni o khi egbegbi igholo ni o la iloghie, oni Ọnọmhuẹ lẹlighuo ọ tọ, ni ọa khi abọ eyi ẹgbọ a rọ tọ li.

³ Eri a zẹ eni e kpeda na ekpodalo-ugamhi eyi Ẹshinegba kpa ni e ri isomhopfa ali iluasobo ke luase. Lọli o zẹ khi Ọni ọ kpeda na ekpodalo-ugamhi eyi Ẹshinegba oyawa, ọ mema mhọli emini ọ li rọ ya luase. ⁴ Agbọ ọ kha la lẹ, ọa kha fẹ khi ọkpodalo-ugamhi ọyi Ẹshinegba, aborọkhia khi ekpodalo-ugamhi eyi Ẹshinegba ni ẹ deba ushi ọyi ẹgbọ iJu e la aghọ eghọ. ⁵ Okhologo ni a ri ide tọ ni e la ga, irokhọkhọ ali aroro ọyi emini e la iloghie e khi. Lọli o zẹ khi abi iMosisi ọ rọ ya tọ oni igholo, khi Ẹshinegba ọọ li, “Zobe ni a bhale ya ẹ khi abi a li rẹ wẹ khasẹ ukhomhi ute, u li ya riẹlẹ wẹ tee.”† ⁶ Ama, memena, akanya ọkpodalo-ugamhi ni a rọ na iJesu, o mu ẹloẹ dọse oni a rọ na ekpodalo-ugamhi enediọ, ẹzẹzẹ abi ishobọ ni ọ migha shi rọ gbe akanya o li mu ẹloẹ dọse onodiọ, itobọ khi o migha nga irọnga eni e ti nẹ.

⁷ Ini ishobọ oni odode ọa mhọli ashini o kpọli le shi lẹ, ọgbọ ọa kha ke mhọli emini a ri ishobọ olese ẹ riẹlẹ. ⁸ Ama Ẹshinegba ọ mẹ ashini ẹgbọ eyọli ẹa kie te gba pfo, lẹli ọ rẹ.
“Oni ogbele ọọ bhale,
ni mhi rọ ya shobọ onogbo

* **8:1** Li zẹ Iwolo 110.1 † **8:5** Li zẹ Okiali 25.40

na egbo iZireni

ali egbo iJuda.

⁹ Oa ya li abi ishobo

ni mhi nu iti-itita we shi,

ogbele ni mhi mu we oobo

rote eke iJipiti ya fie.

Ea ri igesikia deba

oni ishobo ni mhi nu we shi,

itobo igho mhi ro

rue we eloe egbe-a.

¹⁰ Onomhue oo,

ogbele ni oo bhale,

Ishobo ni mhi ya shi

na egbo eyi iZireni na,

Mhi ya ri ishi eyemhe

shi we isamhi,

mhi keke oli shi we udu.

Mhi ya khi Eshinegba oyewe,

wewe e khi egbo eyemhe.

¹¹ Ongewe oa ke ke sese

onuzava oyoli, wekhi eri

o ya lie inyoghuo oli,

‘Leshe Eshinegba.’

Itobo khi wewe nya

e ya leshe mhe,

rote oni o kpoke nya

ya je oni o fune nya.

¹² Mhi ya ri olamhe topfa we,

mhi aa ke gbo ya sato

ipfido oyewe.”†

† **8:12** Li ze ijere 31.31-34

¹³ Abi ọ rọ da lu ishobọ onana, “Onogbọ” egho, o she ri oni ododẹ mele onodiọ-a. Emini o da mele onodiọ-a ni o she ẹ womhẹ, o keleş ya kele-a.

9

Ugamhi na iloghie ali eke agbọ

¹ Ishobọ onododẹ o mhọli ishi ni a rọ ọ ga ugamhi, o gbo mhọli igholo ni a ri ide ghi shi eke agbọ. ² A tọ okhọlo ni a ri ide ghi gasẹ shi elemhi oni igholo. Elemhi owa eva e la ọ oni okhọlo. Elemhi owa ni a kpe ramhi aa lui, Asha no Pfuasẹ. Akaghọ a ri emini a ri ákpá ru ẹ nga shi, ali itebu ni a ri ibuledi ni o pfuasẹ ẹ nga.* ³ Elemhi owa onuzi-eva ni o kpe oobọ na ode ugbakpi ni a rọ pfa ode-a, a lui Ashini o Pfuasẹ nẹ nya.† ⁴ Aghọ adido igolu ni a la toşẹ ituale afu ẹra ni ẹẹ pfiẹ o la. Akpati ishobọ ni a ri igolu ku o li la Ashini o Pfuasẹ nẹ nya. Oni akpati ona, omi utasa igolu o la ọ ni a ri ibuledi imana a shi.‡ Aghọ a li ri orọkpọ oyi Erọni ni o zẹ ukhuli shi, ali ipepẹmhi eche eva ni a keke ishi shi.§* ⁵ Ikpeda na oni akpati ona, a ma emhi eva ni e li abi igeni ni e zẹ ipfua shi, ni e sọ alo ghue ufumhi oyi Eshinẹgba. E naghie ipfua eyewe-a guese ashini a la ri olamhẹ ẹ topfa. Ama ọa khi

* **9:2** Li zẹ Okiali 26.1-30; 25.31-40,23-30 † **9:3** Li zẹ Okiali 26.31-33 ‡ **9:4** Imana khi eminale ni Eshinẹgba ọ rọte idane ruşẹ kule abi amẹ na eniyẹ iZireni abi e rọ rọte iJipiti vu je eke ishobọ, ni a lu iKena § **9:4** Eri orọkpọ onayi Erọni ni a ngme ena ni o she khakha o kie zẹ ukhui onogbọ. * **9:4** Li zẹ Okiali 30.1-6; 25.10-16; 16.33; iNọba 17.8-10; Okiali 25.16; iDeut 10.3-5

memena awa ya me ẹghẹghẹ rọ ke tọno eni emhi ena nya ramhi udi we pfo.†

6 A kha da she lina ri emhi ọgbọgbọ nya shi ashini a rọli ẹ shi se, lọli eni ẹẹ ralo ugamhi e rọ ọ lo elemhi owa onodode ya gbe akanya ọdoda eyewe ọgbẹle kpa.‡ 7 Ama Ọga ọyi ekpodalo ugamhi lọlighuo tse ọ dobe ẹ lo elemhi Owa Ni o pfuase ne nya ni o la ọ. Utoghuo elemhi ukpe ọ lese ẹ lo akaghọ. Ọlia eni ọ rọ luasobo na egbọli ali ẹgbọse shi olamhe ni e lamhe elemhi umhalese, ọọ rue ẹ mholi obo lo akaghọ.§ 8 Eri Ayemhe-nọ-pfuase ọ ri onana guele khi, ọgbọ ọa khueghie ode ni o lo elemhi Owa ni o Pfuase ne nya-a, na ọgbọkhoghuo ne, ini okhologo onodode o kie migha. 9 Eri emhi enana e khi irọkhọkhọ na awa ẹghẹghẹ ana. Emini onana o ngme khi irọna ali iluasobo eyi elamhako ni a luase ukpe khi ukpe khi, ẹa dobe khuese eni e bhale ya ga Eshinegba udu-a pfuase, rewe gba pfo. 10 Ingme eminale, ali onyo ali ikpegbe-a enana e migha shi, ni e khi ushi na elele. Eri ushi onana o gbe akanya ramhi ẹghẹghẹ ni Eshinegba ọ rọ ri ushi onogbo shi eke.

Ọlia eyi iJesu

11 Ama iKirisiti ọ she bhale abi Ọga ọyi ekpodalo ugamhi, ni ọ khi ọyi eminete ni e she bhale. Ọ she lo elemhi Okhologo ni a ri ode ghi ni o fune ogho ni o gba pfo, ni o la iloghie, ni ọgbọ ọa ri abo to wekhi eri o la eke agbo. 12 Abi iKirisiti ọ rote elemhi oni okhologo lo oni elemhi Owa ni o Pfuase ne nya, ọa rue ọlia eyi elamhi ali ena ya luase obo, ama ọlia

† 9:5 Li ze Okiali 25.18-22 ‡ 9:6 Li ze iNọba 18.2-6 § 9:7 Li ze iLev 16.2-34

eyi lolighuo ọ rue utoghuo kpele rọ mie ipfasheke na agboagbo na awa. ¹³ Eri ọlia eyi elamhi ali ena, ali emue eyi ozele ẹna ni a tose-a, ni áá miatse ku egbo ni ẹa pfuase, o rewe khi eni e pfuase idiegbe.* ¹⁴ See ọlia eyi iKirisiti ẹa ke lie li dobe khuese udu oyawa-a pfuase, rọte ikanya ni ẹẹ pfi eghuli. Ikhi oni ọ rọte ekpabo Ayemhe oyi Eshinegba ri egboli na Eshinegba abi iluasobo ni o gba pfo itobo olamhe eyawa-a, ni awa dobe ke ga Eshinegba ni ọ la ọ agboagbo. ¹⁵ Itobo ona iKirisiti ọ rọ migha iteva Eshinegba ali egbo ri ishobo onogbo ona gbe eke, eghẹghẹ agho ni eni Eshinegba ọ lu, e li mie ugu na agboagbo ni Eshinegba ọ rọ nga. Onana o ya ze li, itobo khi ọ ghu eghuli ni ọ rọ gbe olamhe ni egbo e lamhe eghẹghẹ ishobo onodode kua. ¹⁶ Ini ogbo ọ keke shi eke abi a li ya kemhi ugu oyoli se, ni ọ rọ ghua, a mema ya me ọli me gbo khi ọ she ghua neni ogbokhoghuo ọ ya me emhikhoghuo le ugu. ¹⁷ Irari khi emhi afue oni ebe ni a keke abi a li ri ugu ya kia o ya khi, ini oni ọ keke ọli ọ da kie la agbo ne. Ama ini ọ ghu-a se, a rọ tigbe ri ọli ẹ gbe akanya. ¹⁸ Ona o ze khi ishobo onodode ọa kha ze rọ gbe akanya ini ọlia ọa ma ọ lo. ¹⁹ Abi iMosisi ọ rọ ze ishi eyi Eshinegba ye eni egbo se, ọ rue uguabo ọora ni a khili oolu opfopfo shi, ọ roli miatse eni ọlia shi oni emini a keke ishi nya shi, ọ gbo li miatse ku egbo nya. ²⁰ Oo we, “Ọlia eyi oni ishobo na, ni Eshinegba ọọ awa rọ ghue.”† ²¹ Igho ọ gbo li miatse eni ọlia shi oni owa ugamhi ali emhi nya ni a rọ la

* **9:13** Li ze iLev 16.15-16; iNoba 19.9,17-19 † **9:20** Li ze Okiali 24.6-8

ọ riẹle ugamhi.† ²² Abi o li, khi, eri ushi ọọ a ri ọlia ri emhi nya khi eni e pfuase, ali khi ini aa li ri ọlia luase, irolamhe-topfa ọa la ọ. §

²³ Owa Oyi Eshinegba na eke agbo ni a lina ri ọlia ro khi oni o pfuase, irokhokho oyi owa ugamhi na obini iloghie o khi. Ama emini e la obini iloghie, iluasobo oni o tine a mema ro ya rewe shi ipfuase.

²⁴ IKirisiti ọa lo elemhi okhola ni a ri ode ghi ni egbo e ri abo ma ni o khi irokhokho eyi egbegbewe. Ama iloghie ọ ri ochoghọ ya lo, ni ọ la migha odalo oyi Eshinegba na awa memena. ²⁵ Wekhi eri iKirisiti ọ lo iloghie ya ri egboli luasobo iti-ingmingme, abi Ọga oyi ekpodalo ugamhi ọ lie tsua ọlia eni ẹa khi eyoli ẹ lo elemhi Owa ni o Pfuase ne nya, ukpe-khi-ukpe ya luase. ²⁶ Igho ó kha khi lo, eri iKirisiti ọ kha me osue iti-ingmingme abi a te ma agbo. Ama ọa khi igho. Eri ọ bhale utoghwo tse abi oni eghẹghẹ o ro gba, ni ọ ro ri egboli luasobo ro rue olamhe ode-a. ²⁷ Ezeze abi ogbo ọ lie ghu-a utoghwo tse, ọ kha da ghu-a se, ọ bhale shi iguezo.

²⁸ Igho a li ri iKirisiti luasobo utoghwo kpele ni a ro shishi olamhe oyi ebubu egbo-a. Ọ ya gbo bhale utonuzi-eva. Ọa khi ni ọ ro gbo tsua olamhe, ama ni ọ ro tsumhi eni e migha a khe ọli.*

10

Iluasobo utoghwo kpele oyi iKirisiti

¹ Ugamhi onodiọ ni a ga eghẹghẹ Ushi oyi iMosisi, aroro oyi eminete ni ẹ bhale e khi. Ẹa khi wewe e khi egbegbewe we. Eni iluasobo ni a kpe

† **9:21** Li ze iLev 8.15 § **9:22** Li ze iLev 17.11 * **9:28** Li ze Aza 53.12

luasẹ ẹghẹghẹ agho ukpe kpa, ẹa tigbe dobe ri ipfuase ni o gba pfo na eni bhale odalo oyi Eshinegba ya ga ugamhi. ² Ini eni iluasobo ee dobe ri eni ẹgbọ pfuase lo, a kha yemhe eni iluasobo a? Irari khi e kha ri eni e bhale ya ga pfuase utoghuo kpele, ni udu oyewe ọa ke mholi umhaguekia. ³ Ama eri eni iluasobo e yele ẹgbọ olamhe eyewe le ukpe khi ukpe. ⁴ Irari khi ọlia eyi ena ali elamhi ẹa dobe rue olamhe ode-a.

⁵ Irarigho, abi iKirisiti o ro ya bhale agbo, oo Eshinegba,

“Iluasobo ali isomhopfa
ẹa ghole ẹ.

Ama u she ri idiegbe na mhe,
ni mhi ri ungmehi oye
gbe akanya.

⁶ Iluasobo eni a tose
ali iluasobo igbe-olamhe kua
ẹa tigbe ti ẹ ẹloe.

⁷ Igho mhi re,
‘Ghe mhe ana,

Eri mhi bhale ya riẹle
oghuhemhe oye, Eshinegba.’ ”*

⁸ O te eke ya ngme, oo, “Iluasobo ali isomhopfa ẹa ghole ẹ, wekhi iluasobo eni a tose ali iluasobo igbe-olamhe kua e ghole ẹ, wekhi eri e ti ẹ ẹloe.” Ama khi a lese khi eri ushi oo a mema ligho ke riẹle we. ⁹ Igho o ke re, “Ghe mhe ana Eshinegba, eri mhi bhale ya riẹle oghuhemhe oye.” Eri o ri obo ri iluasobo eni ẹlele shi eke, o ri iluasobo oyi iKirisiti to eloli we. ¹⁰ Itobo khi iJesu iKirisiti o riẹle

* **10:7** Li ze Iwolo 40.6-8

oḡhūmḡe oyi Ẹshinḡba, lḡli o zḡ ni a rḡ ri iluasobo ni o ri idiegbe oyḡli luasḡ utoghūo kpele khuḡḡḡ awa nya olamḡe-a pḡuasḡ.

¹¹ Ẹlḡkḡḡḡ, ekpodalo-ugamhi eyi Ẹshinḡba nya e rḡ gbe ikanya ugamhi eyḡwḡ, eri e riḡḡḡ eni iluasobo gbo riḡḡḡ iti ingmi-ingmḡ, ama ḡa tigbe doḡḡḡ rue olamḡe ode-a.† ¹² Ama abi iKirisiti, ḡni ḡkpodalo-ugamhi oyi Ẹshinḡba ḡna, ḡ rḡ luasobo utoghūo kpele oyi igbe-olamḡe-kua ni o khi oyi ona agḡḡḡḡḡḡḡḡḡḡ, ni ḡ rḡ shitḡ obita oyi Eghiele oyi Ẹshinḡba. ¹³ Aghḡ ḡ ke shitḡ migha a khḡ ḡghḡḡḡḡ ni Ẹshinḡba ḡ rḡ ya ri ebe ḡli mele akphawḡ-nga eyḡli-a.‡ ¹⁴ Irari iluasobo utoghūo kpele ni ḡ luasḡ ḡ rḡ ri ḡḡḡḡ eni ḡ rḡte olamḡe pḡuasḡ khi eni e pḡuasḡ agḡḡḡḡḡḡḡḡḡḡ.

¹⁵ Ayḡmḡe-nḡ-pḡuasḡ ḡ gbo pḡi ḡtsḡḡḡ shi ona yḡ awa. Oni odode, ḡḡ,

¹⁶ “Ishobḡ ona mhi ya nu wḡ shi.

Ḡḡḡḡḡḡ ḡ ngme ghḡ khi,

oni ḡghḡḡḡḡ ḡghḡ o kha ramhi,

mhi ya ri ishi eyḡmḡe shi wḡ udu,

mhi kḡḡḡ ḡli shi wḡ ayḡmḡe.”§

¹⁷ Ḡ ke gbo rḡ ma ḡ khi, “Mhi aa ke ya sato olamḡe ali ikanya ebe eyḡwḡ.”* ¹⁸ Irarighḡ, a kha she da ri ena topfa se, ḡḡḡḡ ḡa ke gbo mhḡli emini a ri iluasobo irue-olamḡe ode-a ya riḡḡḡ.

A zḡ ni awa ti bhale deba Ẹshinḡba

¹⁹ Irarighḡ, inyḡḡḡḡḡ-mḡḡ, aborḡkhia ḡlia eyi iJesu e ri igbedu na awa rḡ lo Ashini o Pḡuasḡ nḡ

† **10:11** Li zḡ Okiali 29.38 ‡ **10:13** Li zḡ Iwolo 110.1 § **10:16**
Li zḡ iJere 31.33 * **10:17** Li zḡ iJere 31.34

nya egho, ²⁰ ikhi ode onogbo ni o mholi agbo, ni o ri awa te ode ugbakpi ni a ro pfa ode-a a dose. ²¹ Abi o ro gbo li khia khi awa mholi okpodalo-ugamhi oyi Eshinegba oniemhi ni o o mheshe shi Owa ugamhi oyi Eshinegba na iloghie egho, ²² awa ri udu igesikia ali irudunga ni o migha gboo ti bhale deba Eshinegba. Awa gbo mholi udu ni a ri imiatse oia eyi iKirisiti ro khi ipfuase ni ea ke mholi umhaguekia, ali awa mholi idiegbe ni a ri ameh khushe-a pfuase.† ²³ Awa mu irudushi ni awa guele khi awa mholi mhue gagaga, irari khi Eshinegba ni o shobo na awa, oni a ri egbe e nga o khi. ²⁴ Awa ke sa abi awa li ya ke ri udu shi egbe o, ni awa ke rieie inono ali awa gbe ikanya enete. ²⁵ Awa khi ti egbe ilona oyi egbawa je ukhokho, abi egbo eghuo ee li, ama, awa totobo ke ri udu shi egbe o, aborokhia khi u me khi Ogbele oyi Onomhue o shi ti e bhale.

²⁶ Irari khi iluasobo olese oia ke gbo lao ni o ya rue olamhe ode-a, ini awa mema famhi e lamhe, ikpukhokho khi a she kpe gue oni igesikia ye awa ne. ²⁷ Emini egbo eghoghoe ke ya shito ke khe khi iguezo ni o ri ulishi e mu ali erali na biobiobio, ni o ya pfuse eni ea ya suo eso na Eshinegba-a.‡ ²⁸ Onini o da gbe Ushi oyi iMosisi-a, ni a ro da ri oli gue ezo, ni o ro da lue ne, ni a ro me otsele egbo aava okekhi aase, eri a gbe oli-a, ni oia mholi ilelemhi.§ ²⁹ Se u sa khi a kha li nase eni e ri awe wu Omi Eshinegba eke-a, ni e ri ukpeloe gbe oia ni Eshinegba o ro rieie ishobo, ikhi oia ni o khushe we olamhe-a pfuase, ali eni o khia khi eri e ze emuebe na Ayemhe

† **10:22** Li ze iLev 8.30; Ezik 36.25 ‡ **10:27** Li ze Aza 26.11

§ **10:28** Li ze iDeut 17.6; 19.15

Okhale?*" 30 Irari khi awa leşe ọni ọọ, "Mhẹmhe mhi ya nase eni e lina ngeli, Mhi ya fali oru," ali ọni ọ gbolo ẹ, "Ọnọmhuẹ ọ ya ri ẹgbọ eyọli gue ẹzo."†
 31 Irari khi emhi okhena o khi ni ọgbọ ọ rọ ya pfi obọ lo ingme oyi Eshinegba ni ọ la ọ.

32 A ke sato ẹghẹghẹ ni a rọ leşe mie oni ákpá, ni a rọ migha mu imiesuọ oye ẹ mhue, aboriekhia khi àá na ẹ ukpokpomhi osoli shi ọ. 33 Isheghuo, eri ẹgbọ e ga la igbaa a pfi itsue manya ẹ, a mu okhọli vule shi ẹ ọ. Isheghuo, a kugbe ẹgbọ elese ni a lighọ mu okhọli vule shi ọ. 34 Elemhi eni e la ọgba ighumha ee ala ẹ. Abi a rọ ri itoto mie ẹ itsua, aa khako, a ri oghẹle rue we obọ-a na we, itobọ khi a leşe khi a mhọli itsua eni e tine ni e ya la ọ agbọagbọ.

35 A khi tsua igbedu oyeẹ pfa, irari khi o ma mhọli eleli oniemi. 36 A mhọli iregbemie, ni a bhale ya ẹ khi ini a dobe riele ọghuemhe oyi Eshinegba se, ni a mie emini ọ rọ nga na ẹ. 37 Irari khi Ebe-no-pfuase o ngme ọli khi,

"Ini o rie tẹse ukukuọ,
 Ọni ọ ya bhale ọ ya bhale,
 ọa ya tẹse.

38 Ama eni Eshinegba ọ pfa na,
 irudunga e rọ ya ke la agbọ,
 ama ini ọngewe ọ nyene egbe ukhokho,
 elemhi ẹa ya timhe deba li."‡

39 Awa aa li abi eni ẹ nyene egbe ukhokho ni e ya pfua, ama eni e miesuọ ni a mie pfuese awa khi.

* 10:29 Li ze Okiali 24.8 † 10:30 Li ze iDeut 32.35,36 ‡ 10:38
 Li ze Abak 2.3-4

11

Irudunga

¹ Mena, irudunga khi, ini ọgbọ ọa mhọli akhọkhomhẹ shi udu shi emini ọ ri udu shi eke ẹ khe, ali ni ọgbọ rọ mhọli ọli shi udu guẹguẹguẹ khi emini aa mẹ ne khi e la aghọ. ² Irudunga ona, o ri ẹgbọ enẹde le eva onete odalo oyi Ẹshinẹgba.

³ Awa leşe khi irudunga ona, Ẹshinẹgba ọ rọ ri ungmemhi oyọli ma emini awa mẹ ẹloe nya. Ni a rọ bhale ya ẹ khi, a rọte emini aa ya mẹ ẹloe riẹle emini a mẹ ẹloe.* ⁴ Irudunga, o ri Ebeli ri iluasobo ni e ti doşe eyi iKen na Ẹshinẹgba. Rọte irudunga oyọli, Ẹshinẹgba ọ rọ mie obọ shi ọ khi ọgbọ ni ọ mhọli angeli onete ọ khi, abi Ẹshinẹgba ọ rọ ngme onete irona eyọli. Irudunga ona o ri Ebeli kiele ngme, abi ọ rọ ririẹ ghua.†

⁵ Irudunga a rọ rue Enọki agbọ vu, ini ọ khi mẹ eghuli. Ọgbọ ọa ke mẹ ọli, irari khi eri Ẹshinẹgba ọ rue ọli nga idane. Neni a rue ọli vu, ọ mhọli ọtsele khi ọgbọ ni ọ ri egbe mu Ẹshinẹgba ọ khi.‡

⁶ Ọgbọkhọghuo ọa dobe ya riẹle emini e ri egbe ẹ mu Ẹshinẹgba, ini ọa mhọli irudunga. Irari khi neni ọgbọ ọ ya bhale deba Ẹshinẹgba, ọ mema mhọli irudunga khi ọ la aghọ, khi lọli ọ somhi eni e kuegbe-a nono ọli opfa.

⁷ Irudunga o ri iNoa, abi ọ rọ suọ agua ni Ẹshinẹgba ọ tse ye ọli shi emini aa mẹ ne, rọli ri ikuegbe-a ali ulishi oyi Ẹshinẹgba, khali ọkọ-oke oniemhi ni o pfuese apfe ọli. Irudunga oyọli o ri umha miesuọ oyi eni ẹgbọ na agbọ khase gboo,

* **11:3** Li zẹ Igbae 1.1; Iwolo 33.6,9; IJon 1.3 † **11:4** Li zẹ Igbae 4.3-10 ‡ **11:5** Li zẹ Igbae 5.21-24

ni ọ rọ mie ikhivose itobo khi irudunga oyọli o ti Eshinegba ẹloe. § 8 Irudunga o ri Aburaamu vule abi Eshinegba ọ rọ lu ọli ọ vule ke je ashini ọli shobo khi ọli rọ ya na li le ugu. Ọ rọte eke oyọli vu, abi otseku khia khi ọa lese obini ọọ je.* 9 Irudunga o rọli ngeli eke ishobo abi ọpfe. Ọọ la ifui okholo, igho li khi Aziki ali iGiekọpu, ni e ga le ugu oni ekha oghuo. † 10 Irari khi eri ọ ri ẹloe shi eke khe ẹoli oni o mholi irogbekẹ, ni Eshinegba ọ vi ali ni ọ gbo khi atsona oyọli. 11 Irari irudunga a rọ ri Aburaamu dobe khi ita eniye abi ọ rọ ririye rọ she dose oni eghẹghẹ ni ọ kha la dobe bia omọ ali ni iSera ọ rọ khi aga. Irari khi ọ lese khi Eshinegba ni ọ shobo nali khi ọna igesikia ọ khi lo. ‡ 12 Rọte obo oyi Aburaamu, ni ọ li abi oni oyọli o she pfo se, a te me imimi ni ẹa ze leli abi ikpetata na idane ali ekhashe na ese oke oniemi. §

13 Agbo irudunga egbo ena e kie la ramhi ni e rọ ghua. E kie miesuọ khi wewe e ya mie emini a rọ shobo na we. Eri e lese li rọte odonue pfi alo o me we odalo, o ri egbe mu we. E lama shi ọ khi ena ẹoli oboese ali epfe wewe e khi shi elemhi eke agbo.* 14 Ini egbo e da lina ngme ne, eri o rokhasẹ khi ẹoli oni e ya ke lu oyewe ẹẹ nono. 15 Ini eri ẹoli ni e rọte vu kha o la we udu lo, e kha mholi eghẹghẹ rọ mu egbe pfi je obini e te vu. 16 Eri ẹoli ni o tine o ri okiamhi i gbe we, oni o khi ona iloghie. Irarigho, ọa ri omama mu Eshinegba khi ee lu lue

§ 11:7 Li ze Igbae 6.13-22 * 11:8 Li ze Igbae 12.1-5 † 11:9 Li ze Igbae 35.27 ‡ 11:11 Li ze Igbae 18.11-14; 21.2 § 11:12 Li ze Igbae 15.5; 22.17; 32.12 * 11:13 Li ze Igbae 23.4; 1 Okhe 29.15; Iwolo 39.12

Èshinẹgba ọyẹwẹ, irari khi ọ she mu egbe ẹoli shi eke khe wẹ. ¹⁷ Irudunga o ri Aburaamu ri Aziki luasobo, abi Èshinẹgba ọ rọ mu ọli fẹ bino. Lọli ni ọ she mie oni ekha, ọọ nono ni lọli ri omi ọli ọtuọghuo kpe luasobo,† ¹⁸ aboriẹkhia khi Èshinẹgba ọ gueyẹ ọli khi, “Rọte Aziki u te ya mhọli imi imi ẹ.”‡ ¹⁹ Eri Aburaamu ọ sa li shi udu khi Èshinẹgba ọ doḅẹ ya rọte eghuli guise ọgbọ le. Eri o li abinẹ khi eri oni Aziki ọ ghu-a egho, ni o rọ li abinẹ khi eri Aburaamu ọ rọte eghuli gbo mie Aziki.

²⁰ Irudunga o ri Aziki ku isẹmhe na iGiekọpu ali iSọ shi emini a ya mẹ odalo.§

²¹ Irudunga o ri iGiekọpu abi ọ rọ ya ghu-a sọ iromhi na imi iJosefu ava-ava, ọ da abọ na Èshinẹgba abi ọ li kie ri egbe da orọkpọ oyọli.*

²² Irudunga o ri iJosefu, abi ọ rọ ya ghu-a ngme ingme abi eniyẹ iZireni e li rọte eke iJipiti ya vu shi eke. Ọ guẹle shi eke abi a ya li igua eyẹluẹ.†

²³ Irudunga o ri eni e bia iMosisi rọli sheli ramhi iki esẹ abi a rọ bia li se, irari khi ọa khi ọmọ na tse, ulishi ọa mu wẹ ni e rọ ri ukpẹloe gbe omhẹse oyi oghie.‡

²⁴ Irudunga o zẹ khi abi iMosisi ọ rọ fu vule se, khi ọa lama a ke lu luẹ omi omi iFero ọnọkpotoso.§

²⁵ Ọ lama khi lọli ya nu ẹgbọ eyi Èshinẹgba mẹ osoli, ocho ni luẹ rọ ya li agbọ olamhe ukuku ẹghẹghe.

²⁶ Ọ bino ọli khi, omama ni ọgbọ ọ ri itobọ iKirisiti

† **11:17** Li zẹ Igbae 22.1-14 ‡ **11:18** Li zẹ Igbae 21.12 § **11:20**

Li zẹ Igbae 27.27-29,39-40 * **11:21** Li zẹ Igbae 47.31; 48.1-20

† **11:22** Li zẹ Igbae 50.24-25; Okiali 13.19 ‡ **11:23** Li zẹ Okiali

2.2; 1.22 § **11:24** Li zẹ Okiali 2.10-12

ẹẹ mẹ o mu ẹloe dọşẹ ẹpfue na iJipiti nya. Itobọ khi eleli ni o la odalo ọ ri ukpẹloe shi. ²⁷ Irudunga o rọli rọte iJipiti vu, ni o khia khi ulishi elemhi ibibi oyi oghie ọa mu ọli. Itobọ khi o li abinẹ khi eri ọọ mẹ Ẹshinẹgba ni aa ya mẹ ẹloe, lọli ọa rọ mu egbe pfi. ²⁸ Irudunga o rọli ri Ukpe iPasova na iri-ọlia to ogbhele kọ, ni ọ rẹ, eniyẹ iZireni e miatşẹ ọlia ku shi ogbhele, ini aḡeni eghuli ọ khi gbe emọdiọ eyewẹ-a.*

²⁹ Irudunga o ri ẹgbọ iZireni doḡe da okẹ oniẹmhi ni a lu Okẹ Ifulo, abinẹ khi eni e rọte ekẹ ifufu dọşẹ. Abi ẹgbọ iJipiti e rọ li mu ọli fe, khọnya wẹ, oni okẹ o to wẹ luẹ.†

³⁰ Irudunga o ri ugbe ni a khi gaşẹ iJeriko de ya gbe abi ẹgbọ iZireni e rọ kia gaşẹ ọli se ogbele ishilua.‡ ³¹ Irudunga a rọ tsumhi iRé-àbu ni ọ khi adegbe ni ọa rọ nu eni ẹa suọ esọ na Ẹshinẹgba pfua. Irari khi ẹgbọ iZireni ni a ghie e ka bẹna tọkpẹ oni ekẹ bino, ọ mie wẹ shi owa.§

³² Şẹ mhi ke gbo ya ngme ma ọ? Mhi kie ke zọnọ wẹ? Ẹghẹghẹ ọa la ọ na mhe ni mhi rọ ya ngme ingme oyi iGidiọni, iBaraki, iSamusi, iJefita, iDefidi, iSamuẹni ali emekeḡuele eyi Ẹshinẹgba.*

³³ Irudunga e rọ mu omheşẹ eyi ighie le, e mheşẹ na ẹgbọ abi Ẹshinẹgba ọọ li nono ọli shi. E mie emini Ẹshinẹgba ọ tse ekha na wẹ. E guese inu eyi idu,† ³⁴ e pfuse erali ebe-a, e na pfue eghuli

* **11:28** Li zẹ Okiali 12.21-30 † **11:29** Li zẹ Okiali 14.21-31

‡ **11:30** Li zẹ iJosh 6.12-21 § **11:31** Li zẹ iJosh 2.1-21; 6.22-25

* **11:32** Li zẹ Eḡeuzọ 6.11-8.32; 4.6-5.31; 13.2-16.31; 11.1-12.7; 1 iSam 16.1-1 Ighie 2.11; 1 iSam 1.1-25.1 † **11:33** Li zẹ iDan 6.1-27

ogbhoro. O losẹ wẹ, ama e toto-a, e khi idenomo elemhi okhọli, e pfuse ekhọli-okhue eyi ẹoli oboese-a. † 35 Irudunga, ikpotso e ro gbo mie egbo eyewe ni a rote eghuli guise le bhale agbo. §

Egbo elese e ri egbe mie ugbemhi obe, ẹa lama a wolo wewe abo-a, ama e ghu-a shi ugbemhi obe, itobo khi e ri udu shi irote-eghuli-guale bhale agbo ni o tine. 36 Eghuo o, a rewe li egia, a gbe we itali, a so eghuo igba ro shi ogba ighumha.* 37 A tono we eche, a ri iso kie we shi asha eva, a ri ogbhoro gbolo we-a. E ri ekue elamhi ali isumha ku egbe, e khi ena umha me, a nase we, a li we umumume. † 38 Egbo ni agbo ẹa lu emhi eni egbo ena e khi. E dudu kia kia ifui odagbe ifufu ali ikhomhi ite abi eni ẹa mhọli apfe, ee la elemhi irui ali ifui ese na elemhi eke.

39 Itobo irudunga oyi enana a ro kueghie we, ama ongewe ọa kie mie emini Eshinegba o shobo. 40 Itobo khi Eshinegba o she mhese emini o tine shi eke e khe awa, eghẹghẹ agho e kha kugbe awa o, o ri awa ali wewe gba pfo.

12

1 Aborokhia khi ebubu otsele eyi ingme agbo irudunga e she lina le gasẹ awa ena, awa tsua emini ẹẹ zu awa ode ku-a ali olamhe ni e kele ti awa je ukhokho. Awa ze ni awa ri iregbemie ke na oni unamhi ni a roshi awa odalo. 2 Awa ri eloe shi ijesu egbe ke bino ọli, oni o khi igbaekele ali oni o ri

† 11:34 Li ze iDan 3.1-30 § 11:35 Li ze 1 Ighie 17.17-24; 2 Ighie 4.25-37 * 11:36 Li ze 1 Ighie 22.26-27; 2 Okhe 18.25-26; iJere 20.2; 37.15; 38.6 † 11:37 Li ze 2 Okhe 24.21

irudunga oyawa gba pfo. Ọni ọ ri itobo oghele oni a ro shi eke e khe ọli, ri egbe mie eghuli na apfida, ọ ri ukpeloe gbe omama ni ọ la apfida ya me. Mena, ọ she shito obita ukpekhomhi Eghiele oyi Eshinegba. ³ Pfi ukpeloe ke bino loli ni ọ ri egbe mie ibiselemhi ni me obọ oyi egbo olamhe, ini o khi lose e ni o pfanọ ku e alo.

⁴ Inu-olamhe khe abo oye, ọa kie re ramhi oyi eghuli ne. ⁵ Eri a she yele ungmehi iyude ni Eshinegba ọ nu e ngme-a, abi imi ọli eni emose ali eni ikpotso? Ni ọ le.

“Omi mhe, khi ri
 ọloe gbe isheshe shi ode
 oyi Onomhue,

ali a khi ze ni
 egbe pfo e-a
 ini ọ sheshe e shi ode,

⁶ Irari khi eni Onomhue
 ọ nono ingme oyewe
 ọọ sheshe shi ode,

ogbokpa ni ọ lama
 khi omioli lue khi
 ọọ na osoli.”*

⁷ Ri egbe mie ini a sheshe shi ode, eri Eshinegba ọọ ri ele e abi imi ọli. Mhie ii, omọ onoghwo itali ọa ya sheshe shi ode? ⁸ Ini aa sheshe e shi ode abi a lie sheshe omọ kpa shi ode, eri o rohashe khi waa khi egbegbi omioli ama omọ ni aa lese oni ọ bia li u khi.

⁹ Itawa ena agbo ẹa ya sheshe awa shi ode, ni awa ro kiele e mu ekpe na we? Elo o ze ni awa aa ke ro lili e ze ni oni ọ khi Itawa elemhi ayemhe ọ li

* **12:6** Li ze iJobu 5.17; Ekpi 3.11-12

sheshe awa ni awa mhọli egbegbi agbọ? ¹⁰ Ukuku ẹghẹghẹ itawa ena agbọ ẹẹ sheshe awa shi ode abi o ti we ẹloe shi, ama itobọ onete oyawa Ẹshinẹgba o ro sheshe awa shi ode, ini awa nu ọli mhọli okemhi shi ipfuase oyọli. ¹¹ Isheshe shi ode okhọghuo ọa ya viọlo egbe, ama eri ọọ to. O kha ke deṅe, o ri oni a ligho sese ingme ẹ ngeli angeli enete, ali o gbo mhọli opfomhe. ¹² Irarigho, abọ eye ẹ ni o losẹ ali ikhomhegbhe eye ẹ ni ẹẹ kpheli rerere, a zese we-a.† ¹³ A ke kia ode ni o sheshe talala, ni a ri eni e cheghẹle awe-a ze, ocho ni e ro ya de.‡ ¹⁴ A roshẹka odekhode ni a nu ogbọkpa la agbọ opfomhe, ni a gbo la agbọ ipfuase, irari khi ogbọkhọghuo ni ọa mhọli ipfuase ọa ya me Onomhue. ¹⁵ A roshẹka ini ongeẹ o khi khi oni okhale oyi Ẹshinẹgba ọa ramhi obọ ali a khi ze ni iyese-elemhi-a o ze shi ẹ iteva ni ọọ pfi ingme obe ro pfueche egboese-a.§ ¹⁶ Ogbọkhọghuo o khi khi oni ọọ ku itsebo, weẹ ongeẹ okhọghuo o li abi iso ni ọa mhọli ayemhe oyi Ẹshinẹgba, ni o ri itobọ eminale utoghuo kpele ri ugu odiọ oyọli de.* ¹⁷ A lese khi elelese, abi o ke ro o nono ni lolu mie oni ikhivose, a kie ọli. Itobọ khi ọa ke me asha mu udu pfi, abi o tseku ke ri amẹ evie nono ọli.†

¹⁸ Irari khi aa bhale ute ni a dobe ri obọ o ti, onabi ute iSinai ni egbo iZireni e ke bhale, ni ẹlemhi erali o la a de biobiobio, ni obili ulishi o la, ali ni okiki olitsa o la khili eke, ¹⁹ ali ni akala o la de limhilimhi, ni uruli oniemi o la a ngme, ni egbo ni ẹ suọ oni uruli e ro lema oni ungmehi o kpeşe

† **12:12** Li ze Aza 35.3 ‡ **12:13** Li ze Ekpi 4.26 § **12:15** Li ze iDeut 29.18 * **12:16** Li ze Igbae 25.29-34 † **12:17** Li ze Igbae 27.30-40

aghọ.† 20 Itobọ khi ẹa doḅe ri egbe mie ushi ni a shi na wẹ ni ọọ, “Ini o riẹ khia khi ẹlamhako ọ ri egbe ti oni ute, a mema ya tono ọli echẹ gbe-a.”§ 21 Eri emini a mẹ aghọ o lolo ri ulishi mu ramhi ni iMosisi ọ re, “Ulishi oniẹmhi o ga mu mhe!”*

22 Ama, mena, a she bhale ute iZayo, ali ẹoli oyi Eshinẹgba oni ọ la ọ, iJerusalemu ona iloghie ali obini ilegba oghẹle oyi igeni upfoleli. 23 A she bhale igbaa oyi eni e mie iJesu iKirisiti suọ oyi emodiọ eyi Eshinẹgba, eni a keke eva oyewe shi iloghie. A she bhale deba Eshinẹgba ni ọ khi ọso-ẹzo oyi ẹgbọ kpa, ali a gbo bhale deba ayemhe oyi ẹgbọ enete ni a ro khi eni e gba pfo. 24 A she bhale deba iJesu oni ọ ri ishobọ onogbọ ko, a gbo bhale deba ọlia ni a miatse ku, ni ẹẹ ngme emini e ti dose emini ọlia eyi Ebeli e ngme.†

25 A mu egbe ẹ ini a khi kie ungmehi oyi oni ọ nu ẹẹ ngme. Ini eni ẹgbọ ẹa doḅe pfue ọ, abi ẹa ro ri ungmehi oyi oni ọ la agbọ tse agua ye wẹ gbe akanya, se u sa khi awa li ya pfue ọ, ini awa aa ri ungmehi oyi oni ọ rote idane tse agua ye awa gbe akanya.† 26 Eri uruli oyi Eshinẹgba o nighise eke agbọ ẹghẹghẹ aghọ, ama mena, ọ she shobọ, ọọ, “Oa khi eke agbọ tse mhi gbo ya nighise utoghuo shi ọ, ama li shi ukhui.”§ 27 Eri ungmehi ni ọọ, “Utoghuo shi ọ,” o rokhase gboo khi emini a ma nya, khi a ya nighise wẹ, a rue wẹ ode-a, ni a bhale ya ẹ khi emini ẹa ze nighise e ke kpole.

† 12:19 Li ze Okiali 19.16-22; 20.18-21; iDeut 4.11-12; 5.22-27

§ 12:20 Li ze Okiali 19.12-13 * 12:21 Li ze iDeut 9.19 † 12:24

Li ze Igbae 4.10 † 12:25 Li ze Okiali 20.22 § 12:26 Li ze Agai 2.6

²⁸ Irarigho, aborokhia khi awa a mie omhese ni o a ze nighise egho, a ze ni awa ke kphemhi, awa ri ekpe ali ulishi ga Eshinegba abi o ti shi, ²⁹ irari khi Eshinegba oyawa erali opfuse o khi.*

13

Ugamhi ni o ghole Eshinegba

¹ A kie ligho ke nono ingme oyi egbe e abi inyoghuo. ² A ke sato mie epfese shi owa, a mu we epfese. Irari khi egbo eghuo ee ke ligho, ni e ro mu egbo eghuo epfese, ni ea lese khi igeni e khi ni wewe e mu epfese.* ³ A ke sato eni a mu shi owa ighumha egbe abine khi eri a nu we la agho. A ke sato egbo eni a na osoli egbe abine khi eri a li nu we me oni osoli.

⁴ Omose ali ughue oli e mu ekpe shi angeli oyewe. Omose ali ughue oli e khi li egbe le. Irari khi Eshinegba o ya gue eni e ku itsebo ali eni e kia okia ezọ.

⁵ Zobe ni agbo oye o nuata shi oghumhe ukpago, ze ni emini u mholi o ke khuese e. Irari khi Eshinegba o o lie,

“Mhi aa tigbe ya ze obo,
mhia ya tsue pfia ghue.”†

⁶ Loli o ze ni awa ro ya ri igbedu lie,

“Onomhue o khi
okpaghiobo oyemhe,
mhia ya tigbe na ulishi.

Elo ogbodo be ya li mhe?”‡

* **12:29** Li ze iDeut 4.24 * **13:2** Li ze Igbae 18.1-8; 19.1-3 † **13:5**

Li ze iDeut 31.6,8; iJosh 1.5 ‡ **13:6** Li ze Iwolo 118.6

⁷ A pfi ẹloe bino eni e ralo na ẹ ena ẹlele. Eni e ri irudunga gue ungmehi oyi Ẹshinẹgba ye ẹ. A sa je abi e li ngeli ramhi ni e rọ ghua, ni a ke khọnya irudunga oyewe. ⁸ Ijesu iKirisiti, abeghuo ọ khi, ode, amo, ali agboagbo.

⁹ Khi ze ni osese ẹgbhọli ododa e tsua ẹ udu vu. Irari khi okhale o ri udu oyawa ze-a, ọa khi ni a ri ushi eminale gbe akanya, ni ọa kpaghie eni e rewe gbe akanya obo. ¹⁰ Ama awa mhọli atete ni ekpodalo-ugamhi eyi Ẹshinẹgba na elemhi owa ugamhi oyi ẹgbọ iJu ẹa mhọli afu ya rote le emhi iluasobo. §

¹¹ Eri Oni ọ kpeda na ekpodalo-ugamhi eyi Ẹshinẹgba oyi ẹgbọ iJu ọọ tsua ọlia eyi elamhako lo elemhi Asha-no-Pfuase ne nya ya rọ luase obo shi olamhe irọtopfa, ama eri a rue eni idiegbe eyi eni elamhako fie ifui apfe je odagbe ya tose-a.*

¹² Onana o ze ni ijesu ọ rọ li ghu-a shi ikhokho apfe, ni ọ rọ ri ọlia eyọli ri ẹgbọ khi eni e pfuase.

¹³ Irarigho, a ze ni awa le deba li ikhokho apfe ni awa nu ọli me omama ni ọ me. ¹⁴ Irari khi agbo oola, awa aa mhọli ẹoli ni o lao agboagbo, ama ẹoli ni o ya bhale awa ri ukpeloe shi eke ẹ khe. ¹⁵ Awa ri irarigho rote ijesu ke ri iluasobo ikueghie na Ẹshinẹgba. Ini awa ligho, eri awa pfi otsele shi ọ khi loli ọ khi Onomhue. ¹⁶ A khi yele onete iriele-a, ali ni a gbo ke kpaghie egbe obo, irari khi enana khi iluasobo ni e lie ti Ẹshinẹgba ẹloe.

§ **13:10** Emini onana o ngme khi, 'Awa mhọli atete ni o khi apfida ni ijesu ọ la ri idiegbe oyọli luasobo. Ama ẹgbọ ni ẹ sa khi iluasobo ni a luase elemhi owa ugamhi oyi ẹgbọ iJu, e te ya mhọli imiepfuese, ẹa mhọli okemhi shi oni atete ona.' * **13:11** Li ze iLev 16.27

¹⁷ A ke suọ esọ na eni e ralo na ẹ, a ri egbe ẹ tiemhie na omhẹse oyewe. Eri e ri ukpeloe shi ẹ egbe abi eni e ya rokhase abi e li gbe. A ke suọ esọ na we ni akanya ni ee gbe o ri oghelẹ na we, ini o khi khi itsua na we, irari khi u wa mhọli eleli ni u ya me o. ¹⁸ A ke lema na anye. Anye lese khi udu oyanye o pfuase, anye gbolo ẹ ngeli ke mu ekpe shi egbe anye egbe odekhode. ¹⁹ Mhi gbo ga lolo lema ẹ, a lolo lema Eshinegba o gbo remhe kele nyene egbe bhale deba ẹ. ²⁰ Mhi lema Eshinegba ona opfomhe, oni o ri oia oyi ishobo na agboagbo rote eghuli guise iJesu Onomhue le, ikhi Orisumha-kia oniemhi oyi isumha ogho. ²¹ O ri eminete nya shi ẹ egbe ni a ro ke riele oghumhe oyoli. O gbo gbe ikanya eni e ti oli eloe shi awa egbe, rote obo oyi iJesu iKirisiti, ni o mhọli ufumhi na agboagbo. Atse.

²² Inyoghuo-mhe, mhi lema ẹ, a kuegbe-a ri esọ shi oni usomhi irudusho ona, irari khi ebe ni mhi keke ghi ẹ ena oalolo nuata. ²³ Mhia nono ni a lese khi a she rue iTimoti inyoghuo awa ogba ighumha lasela. Ini o kele bhale, mhi ya roli bhale ya me ẹ.

²⁴ A tse eni ee ralo na ẹ nya, ali egbo eyi Eshinegba nya. Inyoghuo awa eni e la Itili ee tse ẹ.

²⁵ Okhale oyi Eshinegba o ka nu ẹ nya la. Atse.

Ebe-No-Pfuasẹ Ishobo Onogbo
New Testament in Ivbie North-Okpela-Arhe
(NI:atg:Ivbie North-Okpela-Arhe)

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

The New Testament

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files
dated 29 Jan 2022

03be06b0-68fd-500b-b9a9-6bca4b63979a